

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DR. KO CHUNG SEN
(KAMPAR)**

PERTANYAAN : LISAN

TARIKH : 31.10.2016

Y.B. DR. KO CHUNG SEN [KAMPAR] minta **MENTERI KEWANGAN** menyatakan:-

- (a) kesan GST ke atas KDNK Malaysia kesan GST ke atas penentuan keuntungan syarikat-syarikat, khususnya bagi perusahaan kecil dan sederhana; dan
- (b) kepastian bahawa kadar GST tidak akan dinaikkan sekiranya Barisan Nasional memenangi pilihan raya umum akan datang.

JAWAPAN

Dengan pelaksanaan GST dan berdasarkan prospek ekonomi negara yang dijangka berkembang antara 4 hingga 4.5 peratus pada 2016, jumlah keseluruhan hasil Kerajaan Persekutuan dianggar sebanyak

RM212.6 bilion. Dengan hasil tersebut, paras defisit fiskal negara tahun 2016 disasarkan pada 3.1% daripada KDNK, berbanding 3.2% yang telah dicapai pada tahun 2015. Bagi tahun 2017 pula, paras defisit diunjur pada 3.0% daripada KDNK. Kedudukan fiskal yang lebih kukuh akan memastikan kemampanan fiskal jangka panjang negara serta meningkatkan daya saing dan daya tahan ekonomi negara khususnya dalam menghadapi keadaan ekonomi global yang semakin mencabar.

1. Kenaan GST tidak akan memberi kesan kepada peniaga di dalam penentuan margin keuntungan kerana GST tidak akan menjadi kos tambahan kepada syarikat. Ini kerana peniaga boleh menuntut semula GST yang dibayar ke atas input perniagaan bagi bekalan bercukai, manakala bagi bekalan yang dikecualikan, ianya boleh dipindahkan dalam bentuk harga jualan yang mana komponen GST terlibat adalah ditanggung oleh pengguna. Melalui pendekatan tersebut, margin keuntungan syarikat dapat dikekalkan. Bagi syarikat perusahaan kecil dan sederhana (PKS) yang tidak berdaftar GST pula, walaupun syarikat tersebut tidak dapat menuntut kredit ke atas cukai input, mereka masih boleh menuntut amaun GST yang telah dibayar tersebut sebagai potongan di bawah Akta Cukai Pendapatan 1967. Dengan itu, komponen kos GST yang terlibat tidak merupakan tanggungan PKS yang

boleh menjaskan keuntungannya.

3. Untuk makluman Ahli Yang Berhormat, pada masa ini Kerajaan belum bercadang untuk mengkaji semula kadar GST yang pada masa ini ditetapkan pada 6%. Kadar yang ditetapkan tersebut adalah berdasarkan kajian terperinci yang dibuat untuk memastikan kadar GST yang dikenakan adalah yang paling bersesuaian dengan mengambilkira antara lain kedudukan kadar cukai yang telah dilaksanakan sebelum pelaksanaan GST iaitu cukai jualan pada kadar umum 10 peratus bagi barang yang diimport dan dikilangkan dalam negara dan cukai perkhidmatan pada kadar 6 peratus bagi perkhidmatan tertentu. Di samping itu, pelbagai faktor lain seperti komposisi sumbangan hasil daripada sektor tertentu, beban cukai ke atas pengguna, struktur cukai pendapatan dan pakej bantuan kepada pengguna dan perniagaan juga telah diambilkira dalam penetapan kadar GST tersebut. Ini selaras dengan objektif untuk mewujudkan sistem percukaian yang berdaya saing dalam jangka panjang.